

E Kapa di Regata

Ta visto ku esaki ta siman di Regata! Spanduk ta yama bishitantenan bon biní. Komersiantenan ta yena e páginanan di korant ku deseonan pa un "felis Regata." Televishon, radio, i prensa ta duna amplio kobertura di Regata. "Luna di òktobèr ta luna di nos Regata," i "Siman di alegria, ambiente pa un i tur" ta resoná for di kada kas. Muchanan kier sa ku nan tin vakansi PA Regata.

E "nò!" ku obreronan a tende ora nan a pidi algun dia liber e siman aki ta kòrda nan ku esaki ta siman di Regata. Tin mas trabou, mas vuelo, mas kuminda pa restaurant prepará, mas huespet na hotèl, mas kompras na tiendanan.

E siman aki ta nifiká un empuhe pa nos ekonomia. Pa nèt e motibu ei, komishon di Regata ta lucha pa sigui engrandesé e evento aki.

Ma Regata tambe ta KOSTOSO pa nos isla stimá; kostoso moralmente, kostoso spiritualmente, i hopi bes kostoso pa famianan. E kompetensianan kolorido di botonan di piskadó, sunfish, katamaran, èts. sigur ta algu sano. Ma laga nos ta sinsero. En general, nos ta usa e eventonan akuátiko komo un kapa.

Dikon tantu hende ta bai laman e dianan aki? Pa wak e botonan? Algun sigur ta bai ku e proposito ei. Ma na Playa Lechi hopi bes por mira solamente komienso i final di e kompetensia, algu masha laf. Si bo tin oportunitat pa wak e promé 5 minüt di un wega di futbòl, anto sinta 80 minüt sin por mira nada, i despues bolbe mira e último 5 minüt, lo bo bai? Solamente si bo tin hopi interes. Mayoria hende no ta bai laman pa warda e botonan.

Nan tin otro kos di wak: bikini, tanga, èts. Mas sèksi, mas mihó! Hòmbènan ta wak e figuranan femenino kasi sunú ku e mésun mentalidat ku un kachó ta wak un pida karni nèt for di su alkansé...ku masha gana pa desfrutá! I muhénan ta stimulá esaki, gosando e atenshon nan ta haña dor di kubri nan desnudes ku solamente un par di hilu.

Segun Beibel "Kualke ku mira un muhé pa dese'é, ya kaba el a kibra matrimonio (adulterio) ku ne den su kurason" (Mateo 5:28). E PENSAMENTSU inmoral tambe ta piká, no e akto so. Ta klaro ku hopi piká ta tuma lugá na laman e siman aki.

Ma Regata ta stimulá mas ku piká mental. Tin hende ta purba wak kon leu nan por yega. Algun ta haña nan gana, demonstrá pa e echu ku awor nos ta papia di "yu di Regata." Tin eksepsion, pero ta parse ku en general, onestamente bisá, libertinahe ta bira lema di Regata.

Regata a kuminsá 27 aña pasá ku un pustamentu entre Hùbert "Ibo" Domacasé i Don Stewart rònt di Klein Boneiru, pa un premio: 27 kaha di serbes. For di su komienso te awe, aparentemente alkohòl ta mes nesario pa Regata ku awa di laman; Regata i serbes ta inseparabel. Hopi hende no por imaginá Regata sin e bòter den nan man, ku segun nan, ta nesario pa krea ambiente. Echu ta ku hende no ta sinti e mésun libertat pa djòdjò sin betèr den nan kurpa. E serbes ta fungi komo un kalmante pa e konsenshi, dunando kurashi pa violá normanan di moralidat ku bou di otro sirkunstansia e pèrsona lo fantaser so di hasi.

I e orario tambe ta kontribuí na dekadensia moral. Hopi hende ta kore loko loko tras di Las Chicas del Can ku ta aktua te 2 'or di madrugá. Ken sa kuant'or e parandero ku a hinka un òf otro "chica" den su kabes ta yega kas. Ta un echu ku un kurpa kansá, den oranan madrugá, ta ménos alertá. Esaki kombiná ku e betèr ta pone hende lubidá moralidat.

Esaki ta e loke nos ke engrandesé? Nos gobièrnu a kontribuí 75 mil florin i sponsernan a generá e otro 75% di e presupuesto pa promové libertinahe?

Regata ta siman pa gosa, hasi loke nos ke, lubidá moralidat. Ma ora tiponan kriminal tambe ta gosa, hasi loke nan ke, lubidá moralidat, mes ora nos ta pone man na kabes i puntra unda nos ta bai. Nos ta kosechá loke nos a planta. Skritura ta bisa, "No gaña boso mes, Dios no ta laga ten'é di bofon. Pasobra kiku ku hende planta lo e kosechá tambe" (Galationan 6:7).

Laga nos habri wowo i stòp di gaña nos mes. E kompetensia akuátiko a para bira un kapa pa un siman sensual. Nos isla chikitu stimá tin mester di aktividatnan sano. Pero nos no mester engrandesé libertinahe!